

तीमुथियुस क दूसरी पत्र

1 पौलुस कइँती स जउन परमेस्सर क इच्छा स ईसू मसीह क प्रेरित अहइ। अउर जेका मसीह ईसू में जीवन पावइ क प्रतिज्ञा क प्रचार करइ के बरे भेजा गवा बा। 2पियारा बेटवा तीमुथियुस क नाउँ: परमपिता अउर हमरे पभू मसीह ईसू कइँती स तोहे अनुग्रह दया अउर सान्ति मिलइ।

धन्यवाद अउर उत्साह

3रात दिन आपन पराथनन में हमेसा तोहार याद करत भवा, मई ओह परमेस्सर क धन्यवाद करत हउँ, अउर ओकर सेवा अपने पूर्वजन क रीति क अनुसार सुद्ध मने स करत हउँ। 4मोरे बरे तू जउन आँसू बहाए अहा, ओकर याद कइके मई तोहसे मिलइ क आतुर हउँ, ताकि आनन्द स भर उठउँ! 5मोका तोहार उ सच्चा बिसवास भी याद बा जउन पहिले तोहार नानी लोइस अउर तोहर महतारी यूनीके में रहा। मोका भरोसा बा कि उहइ बिसवास तोहरे भी में बा। 6इही बरे मई तोहे याद देवावत हउँ कि परमेस्सर क भेट क ओह जुवाला क जलाइ राखा जउन तोहे सब क मिली रही जब तोह प मई आपन हाथ रखे रहेउँ। 7काहेकि परमेस्सर तउ हमका जउन आतिमा दिहे बाटइ, उ हमका कायर नाहीं बनवत बल्कि हमका सक्ती, पिरेम, अउर आतमसंयम स भरि देत ह।

8इही बरे तू हमरे पभू या मोर, जउन ओनके बरे बन्दी बना भवा बा, साच्छी देइ स लजा जिन। बल्कि तोहका परमेस्सर जउन सक्ति बाटइ, ओसे परमेस्सर क सक्ती दुआरा जातना झेलइ में मोर साथ द्या।

9उहइ हमका रच्छा किहेस अउर पवित्र जीवन क बरे हमका बोलाए अहइ-हमार आपन ओह कीन्ह कर्मन क आधार प नाहीं, बल्कि ओकरे आपन ओह प्रयोजन अउर अनुग्रह क अनुसार जउन परमेस्सर द्वारा मसीह ईसू में हमका पहिले ही अनादीकाल स सँऊप दीन्ह गवा बा। 10परन्तु अब हमार बचावइवाले ईसू मसीह क परगट होइ क साथे-साथे हमरे बरे प्रकासित कीन्ह गवा बा। उ मउत क अन्त कइ दिहेस अउर जीवन अउर अमरता क सुसमाचार क द्वारा प्रकासित किहे बाटइ। 11इही सुसमाचार क फइलावइ क बरे मोका एक प्रचारक, प्रेरित अउर सिच्छक क रूप में नियुक्त कीन्ह गवा बा।

12अउर इहइ कारण अहइ जेहसे मई एन बातन क दुख उठावत अहउँ। अउर फिन भी लज्जित नाहीं हउँ काहेकि जेह प मई बिसवास किहे हउँ, मई ओका जानत हउँ अउर मई इ मानत हउँ कि उ मोका जउन सँऊपे अहइ, उ ओकर रच्छा करइ में समर्थ बाटइ जब तलक उ दिन* आवइ, 13ओह अच्छी सिच्छा क जेका तू मोसे सुने अहा,

ओका बिसवास अउर पिरेम में, जो मसीह ईसू में अहइ ओकर आपन आदर्स सिच्छा बनाए रहा।

14हमरे भीतर निवास करइवाली पवित्र आतिमा क द्वारा तू उस सत्य की रच्छा करा, जउन तोहका सँऊप गवा बा।

15जइसेन कि तू जानत ह कि उ सभन जउन एसिया में रहत हीं, मोका छोड़ ग रहेन। फुगिलुस अउर हिरमुगिनेस ओनहीं में स अहइँ। 16उनेसिफुरुस क परिवारे प पभू दया करइ। काहेकि उ कइयउ अवसरन प मोका सुख पहुँचाए रहा। अउर उ मोरे जेल में रहइ स सरमान नाहीं।

17बल्कि उ तउ जब रोम आवा रहा, जब तलक मोसे मिल नाहीं लिहेस, जतन स मोका निरन्तर ढूँढत रहा। 18पभू करइ ओका, ओह दिन पभू कइँती स दया मिलइ, ओ इफिसुस में मोरी तरह-तरह स जउन सेवा किहेस ह कउनो तरह स उ सेव किहेस ओका तू अच्छी तरह स जानत अहा।

मसीह ईसू क सच्चा सिपाही

2जहाँ तक तोहर बात बा, मोर बेटवा! मसीह ईसू में मिलइ वाली अनुग्रह स मजबूत होइ जा, 2बहुत स लोगन क साच्छी में मोसे तू जउन कछू सुने अहा, ओका ओन बिसवास करइ जोगग मनइयन क सँऊप द्या जउन दुसरेउ केउ क भी सिच्छा देई में समर्थ होइ। 3जउन यातना सबइ आवइँ ओनका मिलकर सामना करा। जातना झेलई में मसीह ईसू क एक अच्छा सैनिक क समान सेवा करत रहा। 4अइसे सबहिं जउन सैनिक क समान सेवा करत हीं अपने आप क साधारण जीवन क जंजाल में नाहीं फँसउतेन काहेकि उ अपने सासक अधिकरियन क खुस करई क बरे कोसिस करत रहत हीं। 5अउर अइसेनइ अगर केउ कीहीउ दउइइ वाली प्रतियोगितन में हींसा लेत ह अउर नियमन क नमाइन, तउ ओका विजय क मुकुट ओह समइ तलक नाहीं मिलत, जब तलक कि उ नियमन क पालन करत करत प्रतियोगितन में भाग नाहीं लेत। 6किसान जो मेहनत करत ह इ उपज क सबसे पहिला भाग पावइ क अधिकारी अहइ। 7मई जउन बताइत हउँ: ओह प बिचार करा। पभू तोहे सब कछू समझइ क छमता प्रदान करी।

8मसीह ईसू क खियाल करत रहा जउन मरे हुअन में स फिन स जिन्दा होइ उठा ह अउर जउन दाऊद क बंसज अहइ। इहइ ओह सुसमाचार क सार अहइ जेकर मई उपदेस देत हउँ 9इही बरे मई जातना झेलत अहउँ। इहाँ तलक कि

दिन अरथ अहइ उठइ दिन जब सबहीं मनइयन क निभाव करइ बरे मसीह आइ अउर ओनका अपने संग रहइ बरे लइ जाइ।

एक अपराधी क नाई मोका जंजीरन स जकड़ दीन्ह गवा बा। परन्तु परमेस्सर क बचन तउ बन्धन रहित बा। 10इही कारण परमेस्सर क चुना गवा लोगन क बरे मई हर दुख उठावत रहत हउँ ताकि उ पचे भी ईमू मसीह मँ मिलइ वाली महिमामयी अउर अनन्त उद्धार क साथे मिलि सकइँ। 11इ बचन बिसवासे क जोग्ग अहइ कि:

अगर हम ओकरे साथे मरा हई, तउ उही क साथे जिअब,

12अगर हम दुख स्वीकार करत अही। त ओकरे साथे सासन भी करब। अगर हम ओका छोड़ तजबइ, तउ तजि देइ उहउ हमका,

13हम चाहे बिसवास हीन होइ, प उ बिसवासी हमेसा-हमेसा बिसवास योग्य बना रही काहेकि नाहीं होइ सकत उ आतिमा निसेधी मिथ्यवादी, अपनेन ही बरे।

स्वीकृत कार्यकर्ता

14लोगन क इन बातन क धियान देवावत रहा अउर परमेस्सर क साच्छी कइके ओन्हे सावधान करत रहा कि उ सब्दन क लइक लड़ाई झगड़ा न करा। अइसेन लड़ाई-झगड़ा स कउनउ लाभ नाहीं होत, बल्कि एनका जे सुनत हीं, उहउ का नस्ट कर देत ह। 15अपने आप क परमेस्सर द्वारा ग्रहण करइ जोग्ग बनाइके एक अइसे सेवक क रूप मँ पेस करइ क यत्न करत रहा जेहसे कउनउ बात क बरे सरमाई क जरूरत न होइ। अउर जउन परमेस्सर क सत्य बचन क सही ढंग स उपयोग करत ह।

16अउर अधार्मिक अउर अर्थहीन बातन स बचा रहत ह काहेकि इ बात लोगन क परमेस्सर स बहुत दूर लइ जात ह। 17अइसेन लोगन क सिच्छा नासूर क तरह फइले। हुमिनयुस अउर फिलेतुस अइसेन ही अहईँ। 18जउन सच्ची सिच्छा स भटकि गवा हयेन। ओनकर कहब बा कि पुनरुत्थान अब तलक होइ चुका बा। इ सबइ कछू लोगन क बिसवास क खराब करत हयेन।

19कछू भी होइ परमेस्सर तउ जेह केतँना ही मजबूत नीव क डाए अहइ, उ मजबूती क साथे खड़ी बा। ओह प अंकित बा, “पभू अपने भक्तन क जानत ह।”* अउर “उ हर एक, जउन कहत ह कि उ पभू क अहइ ओका दुस्टता स बचा रहइ चाही।”

20एक बड़ाके घरे मँ बस सोना-चाँदी क ही बर्तन त नाहीं होत हीं, ओहमँ लकड़ी अउर मिट्टी क बरतन भी होत हीं। कछू विसेस उपयोग क बरे होत हीं अउर कछू साधारण उपयोग क बरे। 21इही बरे अगर आदमी अपने आपके बुराइयन स साफ कइ लेत ह तउ उ विसेस उपयोग क बनी ह। अउर फिन पवितर बनिके अपने सुवामी क बरे उपयोगी सिद्ध होई। अउर कउनउ अच्छा कामे क बरे तइयार रही।

22जवानी क बुरी इच्छन स दूर रहा, धार्मिक जीवन, बिसवास, पिरेम अउर सान्ति क बरे ओन्हन सब क साथे जउन सुद्ध मने स पभू प बिसवास करत हीं, पुकारत हीं,

“पभू ... जानत ह” गिनती: 16:5

कोसिस करत रहा। 23मूर्खता स भरा, बेकार क तर्क बितर्क स हमेसा बचा रहा। काहेकि तू जानत ह कि एनसे लड़ाई-झगड़ा पैदा होत ह। 24अउर पभू क सेवक क तउ झगड़इ न चाही। ओका तउ सब प द्या करइ चाही ओका सिच्छा देइ मँ जोग्ग होइ चाही। ओका सहनसील होइ चाही। 25ओका अपने विरोधियन क भी विनम्रता क साथे समझइ चाही। और परमेस्सर ओनका हिरदइ बदल देइ ताकि ओनका सत्य क गियान होइ जाइ 26अउर उ सचेत होइ क सइतान क ओह फन्दा स बचि नकरईँ जेहमँ सइतान ओनका जकड़ी रखे बाटइ ताकि उ पचे परमेस्सर क इच्छा क अनुसरण कइ सकईँ।

अन्तिम दिन

3 याद रखअ अन्तिम दिना मँ हम पे बहुत खराब सराब समइ आइ। 2लोग अपसब्द निकारिहीं, महतारी-बाप क अवहेलना करइवाला, निर्दय, अपवितर, 3पिरेम रहित, छमा-हीन, निन्दक, असंयमी, बर्बर, जउन कछू अच्छा बा ओकर विरोधी, 4बिसवासघाती, अविवेकी, अहंकारी अउर परमेस्सर पिरेमी होइ क अपेक्षा सुखवादी होइ जइहीं। 5उ धरम क देखावटी रूप क पालन तउ करिहीं परन्तु ओनके भितर सकती क नकार देइहीं। ओनसे हमेसा दूर रहा।

6काहेकि एनमे स कछू अइसेन हयेन जउन घरे मँ घुस पइठि कइके पापी, दुर्बल इच्छा सकती क पापसे भरा हर तरह क इच्छन स चलायमान स्त्रियन क वस मँ कइ लेत हीं। 7इ सबइ स्त्रियन सीखइ क जतन तउ हमेसा करत रहत हीं, परन्तु सत्य क सभन गियान तलक उ कभउँ नाहीं पहुँच पउतिन। 8यन्नेस अउर यम्ब्रेन्स तउ जइसेन मूसा क विरोध किहे रहने, वइसेन ही इ लोग सच क विरोधी अहईँ। इ लोगन क बुद्धि भ्रष्ट बा अउर बिसवास क अनुसरण करइ मँ ये असफल हयेन। 9परन्तु ये अउर जियादा आगे नाहीं बढ़ पइहीं काहेकि जइसे यन्नेस अउर यम्ब्रेन्स क मूर्खता परगट होइ गइ वइसे ही एनकइ मूर्खता भी परगट होइ जाई।

अन्तिम आदेस

10परन्तु, कछू भी होइ मोर सिच्छा क पालन किहे अहा। मोर जीवन की राह, मोरे जीवन क उद्देस, मोर अटल बिसवास, मोर सहनसीलता, मोर पिरेम, मोर धीरज 11मोर ओन्हन सबइ यातना अउर सबइ पीड़ा मँ मोर साथ दिहे अहा तू तउ जनबई करत ह कि अन्ताकिया, इकुनियुम अउर लुस्त्रा मँ मोक केतँना भयानक यातना दीन्ह गइ रही जेका मई सहे रहेउँ। परन्तु पभू त ओ सबसे मोर रच्छा किहेस। 12उ समइ परमेस्सर क इच्छा क अनुसार जउन जिअइ चाहत हीं, सतावा ही जइहीं। 13परन्तु पापी अउर ठगन दुसरन क छलत भए अउर खुद छला जात भए खराब स खराब होत चला जइहीं।

14परन्तु तू जउने बातन क सीख्या ह अउर मान्या ह, ओन्हे करत जा। तू जानत ह कि ओह पर बिसवास कइ सकत ह जेनसे इ बातन क तू सीखे रह्या। 15अउर तोहका

पता बा कि तू बचपन स ही पवित्र सास्तरन क भी जानत अहा। उ पचे तोहका ओह विवेक क दइ सकत हीं जेका मसीह ईसू बिसवास क द्वारा छुटकारा मिलि सकत ह। 16हर एक पवित्र सास्तर परमेस्सर क प्रेरणा स रचा गवा बा। उ लोगन क उचित जीवन का संदेस देत ह। उ लोग क सत्य क सिच्छा देइ ओनका सुधारइ ओन्हे ओनकर बुराइयन दर्सावइ अउर पवित्र तथा सुद्ध जीवन क प्रसिच्छन में उपयोगी बा। 17जउन परमेस्सर क सेवा सास्तरन क प्रयोग कइ क करत ह सब तरह क अच्छा कामन क करइ बरे तइयार रहब अउर हरेक नीक काम क करइ बरे जरूरत क हर एक चीज ओकर लगे होइहीं।

4 परमेस्सर क साछी कइके अउर मसीह ईसू क आपन साछी बनाइ क जउन सबहिं जिअत अउर जउन मरि चुका बाटेन, ओनकइ निआउ करइवाला अहइ, अउर काहेकि ओकर फिन स आगमन अउर ओकर राज्य लगे बा, मई तोहसे सपथ स हुकुम देत हउं। 2सुसमाचार क प्रचार लगातार करा। चाहे तू पचन क सुविधा होइ या असुविधा आपन कर्तव्य करत रहा। लोगन क का करइ चही, ओनक समझावा। जबहिं उ पचे बुरा काम करइ ओनका समझावा लोगन क धीरज दइके समझावत भए ओनका प्रोत्साहित करइ चाही। यह सब धीरज और सावधानी स दी गइ सिच्छा द्वारा करा। 3मई इ एह बरे बतावत हउं कि एक समइ अइसा आई जब लोग अच्छा उपदेस क सुनब तक न चइहीं उ आपन इच्छन क कारण अपने बरे बहुत स गुरु एकठठा कइ लेइहीं, जउन उहइ सुनइहीं जउन उ पचे सुनइ चाहत हीं। 4उ पचे आपन कानन क सत्य स फेर लेइहीं अउर कल्पित सबइ कथा प धियान देइ लगिहीं। 5परन्तु तू निश्चय स सब परिस्थितियन में संयमी रह्या, सबइ यातना झेला अउर सुसमाचार क प्रचार क काम करा। जउन सेवा तोहका सऊँपी गइ बा, ओका पूरा करा।

6जहाँ तक मोर बात बा, मई तउ अब अर्घ क समान उँडैला जाइ पर हउं। अउर मोर तउ एह जीवन स विदा लेइ क समइ भी आइ पहुँचा अहइ। 7मई उत्तम स्पर्धा में लगा रहा हउं। मई आपन दउड़-दउड़ चुका हउं। मई बिसवास क रास्ता क रच्छा किहे हउं। 8अब विजय मुकुट मोर प्रतिच्छा में बा। जउन अच्छे जीवन क बरे मिलइ क बा। ओह दिना निआउ कर्ता पभू मोका विजय मुकुट पहिराई। न केवल

मोका, बल्कि ओन्हन सभन क जउन पिरेम क साथे ओकरे परगट होइ क बाट जोहत रहत हीं।

निजी सनेस

9मोसे जेतैना जल्दी होइ सकइ, मिलइ आवइ क पूरी जतन करा। 10काहेकि एह जगत क मोह में पड़िके देमास तउ मोका तियाग दिहे अहइ अउर उ थिस्सलुनीके चला गवा बा। क्रेसकेंस गलातिया क अउर तीतुस दलमतिया क चला गवा बा। 11केवल लूका ही मोरे लगे बा। मरकुस क लगे जाब अउर जब तू आवा, ओका अपने हाथे लइ आवा काहेकि मोर काम में उ मोरे बहुत सहायक क होइ सकत ह। 12तुखिकुस को मई इफिसुस भेजत अहउं।

13जब तू आवा, तउ ओका कोट के, जेका मई त्रोआस में करपुस क घरे छोड़ि आइ रहेउं, लइ आवा। मोर कितबियन, विसेस कर चमड़े क चिटिठन क लइ आवा।

14ताम्रकार सिकन्दर तउ मोका बहुत हानि पहुँचाए अहइ। उ जइसेन किहे अहइ, पभू ओकरे करमन क अनुसार ओका वइसेन फल देई, 15तूहऊँ ओसे सचेत रहा काहेकि उ मोर उपदेस क घोर विरोध करत रहा बाटइ।

16सुरू में जब मई आपन बचाव पेस करइ लागउं तउ मोर पच्छ में कउनो सामने नाहीं आवा। बल्कि ओन्हन तउ मोका अकेलइ छोड़ि दिहे रहेन। परमेस्सर करई ओन्हे एकर हिसाब न देइ पइइ। 17मोरे पच्छ में त पभू खड़ा होइके मोका सकती दिहेस। त्ताकि मोरे द्वारा सुसमाचार क भरपूर प्रचार होइ सकइ, जेका सभन गैर यहूदियन सुनि पावई। सिंह क मुँह स मोका बचाइ लीन्ह गवा बा।

18कीहींउ पाप क भारी हमला स पभू मोका बचाई अउर अपने सरग क राज्य में सुरच्छा स लइ जाई। ओकर महिमा हमेसा हमेसा होत रहइ। आमीन।

पत्र क समापन

19प्रिस्का, अक्विला अउर उनेसिफुरुस क परिवार क नमस्कार कह्या। 20इरास्तुस कुरिन्थुस में ठहर गवा बा। मई त्रुफिमस क ओकरी बीमारी क कारण मीलेतुस में छोड़ दिहे अहउं। 21जाड़ा स पहिले आवइ क जतन करा। यूबुलुस, पुदेस, लिनस अउर क्लौदिया अउर सभन भाइयन क तोहे नमस्कार पहुँचइ।

22पभू तोहरे साथे रहइ। तू सब प पभू क अनुग्रह होई।